



Шочмо эл, порылык да чын верч!

Б У Д Ъ ★ Г О Т О В

31-ше (3782) №,
2026 ий 7 август,
кугарня



0+

Имде лий

1933 ий 1 февраль годсек лектеш

Кенгежын поянлыкше — телылан шапаш



Кенгеж, чевер кенгеж, тый шокшо игечылан, түрлө түсан чиялан веле огыл, емыж-саскалан, пакчасаскалан поян улат! Сад-пакчашке лектын, тамле пушым шижын, мөржымат, энгыжшымат тамлен ончымо шуэш. Но нуно идалык мучко мемнам куандарен огыт керт. Юалге шыжым я йүштө телым кенгеж пагытым шарналташ манын, кажне гаяк ешыште вареньым, компотым шолтат, киярым, помидорым шинчалтат, түрлө салатым ямдылат. А Волжский округ Нурсола гыч Марина ден Александра Степановамытын (снимкыште) пөртйымалышт банке дене темын.



Фотом еш архив гыч налме.

«Марисола
йыр 111 түрлө
кушкыл кушкеш», –
манеш Регина
Мамаева.



Виян да патыр
марий рвезе мунло
шонымашыжым
раш да чаткан
ойлен мошта.



Шокшышто
пийлан кузе
полшыман? Вашмутым
«Ныл йолан йолташна»
лаштыкыште
муыда





9-11-ше класслаште тунемше
ўдыр-рвезе-влак, уш-акылдам
Х «Всероссийский
экономический диктант»
акцийыште тергыза. Тўрыс
увер – diktant.org сайтыште.

Заметкым сераш, видеом
войзаш, фотом ышташ кумылан
улыда? Тугеже «МедиаЛаб»
конкурс тыланда келшен толеш.
Йодмашым 13-17 ияш йоча-влак
колтен кертыт. Сенгышлан –
«Океан» всероссийский йоча
рўдерыш путёвко.

Еш дене погынен кочкаш
ыштымыдам видеош войзыза
да «Бабушкины рецепты»
конкурсышко ушныза.
Келшыше тагасым ойырыза да
30 октябрь марте йодмашым
колтыза.



27-30 августышто Йошкар-
Олаште «И краткая»
III кинофестиваль эртаралтеш.
Организатор-влак тўрлў
пайдале мероприятийым
ямдыленыт. Телефонш кинем
войзаш тунемашат йўн лиеш.

15-16 августышто Медведево
ипподромышто «Йошка Еш»
регион-влак кокласе
IV гастрономический фестиваль
эртаралтеш. Тушто Российысе
калык-шамычын кочкышыштым
ямдылат, тўрлў рецепт дене
палдарат, еш дене каналташ
кумдыкым келыштарат.

Йошкар-Ола гыч Завойскинмыт
еш «Идалыкын ешыже -2026»
всероссийский конкурсышто
«Семья – хранитель традиций»
тагасыште сенген.
Саламлена!



Еш дене пырля

Эртыше тылзе мучаште Смоленск
кундемыште «Родные-Любимые»
кенежымсе еш слёт эртаралтын.
Тушко элнан 32 регионжо гыч
56 еш ушнен. Марий Эл гыч Козьмо-
демьянск олаште илыше Ерофеев-
мыт еш **(снимкыште)** миен коштын.

– Пўртўс лонгаште моло еш-влак
дене жапым пайдалын эртаренна.
Мыланна, участник-влаклан, тўвыр-
гў программим ямдыленыт: кугы-
ен да йоча-шамычлан кўлешан лек-
цийым лудыныт, мастер-классыште
у сомыллан тунуктеныт, концертым
ончыктеныт, «Смоленское Поозе-

рье» национальный паркыш экскур-
сий дене коштыктеныт. Тулото йыр
погынен, мурым йонгалтарыме,
пырля колым кучымо поснак кел-
шен, – каласыш Татьяна Сергеевна.

Татьяна ден Евгений Ерофеев-
мыт шочмо кундемым йўратыше,
еш йўлам жаплыше кок икшывым
куштат. Людмила ден Кирилл Козь-
модемьянск оласе «Дарование»
школ-интернатыште тунемит, чол-
галыкыштым тўрлў мероприяти-
йыште, конкурсышто ончыктат.

Оля МАЙКОВА.

Фотом еш архив гыч налме.

Тау, «Орлёнок»!

Тений кенежым ик эн кугу шо-
нымашем шукталте. «Орлёнок»
всероссийский рўдерыш, «Олим-
пийский» лагерьыш миен толым.
Тушко логалаш манын, эн ончыч
ме Волжск оласе экологий рўдер
пеленысе «Хранители леса» школ
лесничестве дене «Подрост» все-
российский конкурсышто тўшка
дене сегенна. Йывыртен, кужу
корныш тарваненна. «Лесной под-
рост» смене пўртўсым йўратыше
ўдыр-рвезе-влаклан йырым-йы-
рысе тўням вес могырым ончалаш,
пўртўс нерген шуко онгайым пален
налаш полшен.

Кажне кече мероприятийлан по-
ян лийын. Ме экокормо дене кош-

тынна. Тыглай веле огыл, чыла
эскеренна, вес семын ужаш туне-
мынна. Шинчымашым пойдарыше
мастер-классше, лекцийже мыняр
лийыныт! Эше пырдыж-газетым
тўшкан сўретленна, чиялтенна –
пўртўсым нимучашдымын йўра-
тымынам ончыкташ тыршенна.
Икымше верым сенген налынна!

«Орлёнок» шинчымашым веле
огыл келгемден, тыгак поро,
волгыдо шарнымашым, сай йол-
ташым пўлеклен. Чылалан кугу
тау! Кажне йочалан «Орлёнокыш»
логалаш тыланем.

Сабина ТИМОФЕЕВА.

2-шо номеран Волжск школ.

Фотом еш архив гыч налме.



📷 Сабина (шолга гыч визымше) – школ лесничествын енге-влак да Волжск оласе экологий рўдерын вуйлатышыже да тунуктышыжо-шамыч дене пырля.



Кенгежым каныме, юарлыме шуэш. Туге гынат ты пагытыште ятыр сомыл улмым ме раш палена. Садлан ача-аваланна полшена. Школ кумдыкымат эрыкташ коштына. 27-31 июльышто школ стадионышто шудым удыренна (снимкыште). Туге кумдык ару-

эмын, сылнештын. Дежурствына годым киярым, помидорым, түрлө емыжым погенна. Кугыен-шамычлан эреак полшаш ямде улына.

7-ше классыште тунемше-влак.
Волжский, Сотнур.
Фотом школ архив гыч налме.

Угинде пайрем

2 августышто мемнан кундемыште Угинде пайремым пайремлат. Марий йўла почеш, тиде кечылан ковам мелнам, когыльым кўэштеш. Тыгак у паренгым кўнчен, тамле шўрым шолта. Иолташем-влакым (снимкыште) тамле когыльым кочкаш ўжым. Чылалан келшен.

Дима БАШИРОВ.
Татарстан, Агрыз, Буйма.
Ольга Изгибаеван фотожо.



Тутло сий

Кенгежым могай кочкыш эн тамле? Ўдыр-влакын вашмутыштым ончалаш темлем.

Алёна ЯНЫШЕВА, Удмуртий, Карагёл, Шопкер:

– Кызыт пакчаште витаминлан поян саска лын. Чылажымат шер теммеш кочман. Кияр ден помидор гыч салатым чўчкыдын ямдылем. Тудым ўмбал дене варем.



Ирина МИХАЙЛОВА, Татарстан, Агрыз, Пелемеш:

– Шоптыр, энгыж, мөр – чылажат тутло. Снеге кўмө тат моткоч шергакан. Емыжым погаш еш дене коштына. Мотор пўртўс лонгаште чон почын кутырена.

Настя МУХАМЕТОВА, Оршанке, Кугунур:

– Арбуз ден дыньым йōратем. Моткоч тамле улыт. Шокшышто нуным кочмеке, йўмō шумо пыта.



Оля МАЙКОВА ямдылен.
Авторын фотожо-влак.

Кенгежын поянлыкше — телылан шапаш

Тўнгалтышыже — 1-ше лаштыкыште.

Ўстембакышт ончалат гын, шинчат шарла: вишне, пуншоптыр, энгыж, шемшоптыр, ошшоптыр, сливе, тибет энгыж, голубике, олма, кияр, помидор, шере пурис. Чылажат Степановмытын пакчаштышт кушкын. А банкысе компотшым, вреныжым, салатшым ужатат, шўвылвўдет йога!

Моло ўдыр-влак телефон, компьютер ончылно жапым утларак эртаренит гын, Марина ден Саша

аваштлан, чолга, уста озавате Надежда Евгеньевна, полшенит. Эн ондак саскам погенит, мушкынит, вареньым, компотым шукужым скеак шолтеныт.

— Компотым шемэнгыж, йошкар, ошшоптыр, вишне, апельсин але лимон да пўртнык, базилик да лимон гыч ямдылена. Чылаже 80 банке! Эше ломбыгичке гыч ышташ чон йўла. Шемшоптыр, олма да энгыж гыч вареньым йōратена. Кияр ден помидорымат шинчалтена, тений түрлө лечом ямды-

лаш кумыл уло. Ятыремыж-саскам кылмыкташ оптенна. Телым ўдыр-влак торык да ўмбал дене кочкаш йōратат. Лум луммо, поран ўшtmō годым шинча ончылно уэш сылне кенгеж пагыт сўретлалтеш, — оила Надежда Евгеньевна.

Сад-пакчаште ятыр емыж-саска шукертак шуын да шочмым чарнен. Но Степановмытын тамле кенгежышт умбакыже шуйна. Нуно ий еда дыньым, арбузым шындат. Вашке нуным тамлаш тўнгалыт.

Христина АЛЕКСАНДРОВА.



Поян тылзе

Август тамле пӧлекшым мыланна йӧршын ок чамане. Емыж-саска чыла гаяк шуын, пакчасаскат куандараш тӱгӱлын. Теплицыште кияр оза-лана, пуйто «Нал, коч» маныв ойлынеже. А йошкар помидор йырагыште кавасе шӱдырла волгалтеш. Мый кабачоным утыждене йӧратем. Шукерте огыл чесноком кӱнчен лук-тынна. Тудым иктаж-могай чesyш ешарет гын, тутло тамым пурта. У паренге тений шолдыра. Пакчашке эрдене лектат – йӱдым мо-гынат шуын, мом-гынат налын кочкаш лиеш. Шоганым лукташ але эр, ужал пылышыже-влак салтак гай шогат. Шинчалтыме помидор, кияр, компот, варене банке-шамыч, пакчасаска корзинга – кенжежымсе пашан кугу лектышыже. Август пуйто шокшо тургымым иктешла: кушкылым шошо годсек ончышо-влакым пӱртӱс порын суапландара.

Юлия ЯГОДАРОВА.
Советский, Кельмаксола.



Элеонора НИКИТИНАН сӱретше.
Марко, Купсола.

Марисолаште кажне кушкылым шымлен

Йол йымалне ятыр тӱрлӧ кушкыл кушкеш: корнышудо, лопшудо, нуж, висвис... Икмынаржым ме раш палена. А южыжым, кажне кечын ужына гынат, ны кузе маналтмышт, ны могай пайдам кондымышт нерген огына шоналте. Шернур округ Марисола школышто 11-ше классым тунем пытарыше Регина Мамаева (**снимкыште**) шочмо кундемыште кушшо кушкыл-влакым шымлен, гербарийым ыштен (**снимкыште**) да «Атлас травянистых растений» электрон атласым чумырен.

– Марисола йыр 111 тӱрлӧ кушкыл кушкеш. Тышеч 23-шо – отызан культур, 22 сложноцветный, 18 губоцветный, 11 пырчан, молатын чотышт шагалрак. Йошкар

книгаш пуртымо ныл кушкыл уло: нарынче киякшудо, кудреватый лилий пеледыш, шем водяника, алтайский ветренице, – тыгай иктешлымашым ыштен Регина.

Ӱдыр кушкыл-влакым шошым да кенжежым эскерен. Пашаштыже И.А.Губановын атлас-определительжым кучылтын. Биологий туныктышыжо В.Д.Бурда полшен. Фото почеш кушкылым пален налаш маныв, келшыше приложенийым кучылтын.

– Шымлыме годым рокын ойыртежым, климатым, мланде куралмым да ятыр вес палым шотыш налынам. Шернур кундемыште июлышто южын кокла температуржо 18 градус марте



кӱзен, январьыште –14 градус марте волен. Вӱдыжгылыкым шотлаш нелырак. Вершӧр

курыкан. 31 энгер, кугуракше – Лаж, Немда, Сердяжка, лу плотина, коло утла пӱя уло. Чодыра 18,3 процент мландым айла. Марисола Оно да Шабан эгерла коклаште верланен. Кум могырым – чодыра. Ял-влак икте-весе деч тораште огыл верланенит. Вольык кызыт уке гаяк, а ожно ситышын лийын. Садлан пасум шымлыме годым нунын кӱтӱштӧ мландым тошкымышт нергенат мондыман огыл, – ойла ӱдыр.

Шымлыме паша пеш лектышан лийын. Атласым биологий урокышто, тӱрлӧ кружокышто кучылтыт.

Оля МАЙКОВА.
Фото-влакым еш архив гыч налме.

Ошпонгым погенам


Кенжежым чодыраш миен толаш могай ямле. Теве ладыра куэ, чевер пызле. Туштак кож, нулго, пӱнчӧ ужал сывынышт дене моторын койын шогат. Чылажат чоным куандара. Сӧрал марий чодырана моткоч поян.

Тушто ошпонгым мумемлан моткоч йывыртенам (**снимкыште**). Тудым эн тамлылан шотлем. Витаминлан поян понго куэ да пӱнчӧ йымалне шочеш, вӱдыжгырак ве-

рым йӧрата. Пушенгылан ятыр пайдам конда. Упшыжо 25 сантиметр марте кушкын да тӱсым ващталтен кертеш.

Йомак ден легендылаште ошпонгым пиалым кондышылан шотлат. Тудым мушо енгын шонымашыже шукталтеш, маныт.

Юля ВОРОНЦОВА.
Йошкар-Ола
Фотом еш архив гыч налме.





Марий йылме — ончыкылыклан корно

Марий рвезе виан, патыр, лүд-дымё лийшаш манмым чўчкы-дын колына. Тылеч посна тудо мунло шонымашыжым тич-машын, раш да чаткан ойлен моштышаш. Тидлан лудмаш конкурс-влак моткоч полшат. Теве 1-ше номеран Морко школышто 9-ше классыш вончышо Максим Пименовын (**снимкыште С.В.Никитина дене пырля**) сылнымут произведенийым лудмыжым колышт шерет ок тем!

Максим марла изинек яндарын мутлана. Морко посёлкышто илыше Никитинмыт ешышке илаш куснымекеже, талант памашыже утыр шолаш тўнгалын. 2022 ий гыч тўрлў конкурсышто мастарлыкшым терга. Районышто эртаралтше ик сылнын лудмаш конкурсымат ок кодо, манаш лиеш.

— Марий йылме — тўняште ик эн сўрал, ныжылге йылме. Марла почеламутым лудмо лышташын лывыргын тарваныл-



мыжым я памашын йоргыктен йогымыжым ушештара. Сылнын лудаш моткоч йўратем. Тўрлў конкурсым увертарыме нерген авам Наталья Вячеславовна але марий йылмым туныктышо София Васильевна Никитина ойлат. Лудмаш конкурслан произведенийым туныктышем моштен

ойыра. Вара пырля сылнын каласкалаш тўнемына, шуко ямдылалтына. Сегышыш лектамат, моткоч йывырте. Авам ден туныктышемлан тауштем, — оила рвезе.

М.Пименов Казаков, Колумб, Апакай, Чавайн лудмашлаште ятыр гана ончылно лийын. «Самырык тукум» республикисе йоча усталык конкурсышто «Сылнымут да сем композиций» таңгасыште сегышыш лектын.

— Тўнгалтыште сценыш лекташ лўдмашан ыле. Тўргыжланенам, шўмем чот кўлткен. Почеламутын шонымашыже колыштшо дек миен шуко манын, чонем пыштен лудаш тыршем. Кызыт калык ончылно шкем эрыканрак шижам. Марий йылме, марий почеламут ончыкылыклан кумда, волгыдо корным почыт манын ўшанем, — оила Максим.

Христина АЛЕКСАНДРОВА.
Фотом еш архив гыч налме.


Кроссворд

Шола гыч пурлашке:

- Марий композитор.
- М.Шкетанын «Мичун уке ачажат» ойлымашыж гыч ўдырамаш.
- Ш.Осыпын «Акырсаман» повестьше гыч тўн герой.
- ўдырамаш поэтессе. «Ава кид» почеламутын авторжо.
- Марий поэт Иван ...
- В.Ивановын «Вўдшў келге, серже тура» повестьше гыч герой.
- Шадт Булатын шочмо кўндемже.

Кўшычын ўлыкў:

- Ш.Осыпын «Акырсаман» повестьше гыч ўдырамаш.
- Советский районысо писатель.
- В.Сузын «Вакш йонгышта» ойлымашыж гыч герой.
- Марий академик.
- В.Ивановын «Вўдшў йога, серже кодеш» повестьше гыч герой.
- И.Одарын «Таргылтыш» ойлымашыж гыч герой.
- Д.Орайын «Чолга шўдыр» повестьше гыч кочан лўмжў.
- З.Каткован повестьше.



Надежда ИЛЬИНА ямдылен.
Волжск, Карай.

Пайдале книга

Юрий Ясмурзинын «Йорталте, имнем!» книгажым йўратен лудынам. Тушто автор имным ончымо нерген серен, ой-кангаш-влакым пуэн. Савыктышым тўрлў сўрет, фотографий дене сўрастарыме. Калыкмут ден почеламут-влакым, эсогыл чайнворд модышым ешарыме.

Ты ушан суртволькым кучаш шонышылан книга моткоч пайдале лиеш, шонем.

Дана КУШАКОВА.
Морко, Коркатово.

Кенгеж

Ал кенгеж, мотор кенгеж,
Кече сылнын ончалеш.
Тўр пасу, ужал чодыра,
Олыкнаже йытыра —
Ах, шўм-чоным ырыкта.
А мардеж могае лай,
Тиде пагыт ямле, сай.

Андрей УШКОВ.
Волжский, Сотнур.



8 август –
пырысын
тўнямбал
кечыже



Мырлат, озаштым йӧратат

Эртыше ийын йочасадыште «Метыйын йолташет улына» кружокым вўденам. Икшыве-влак дене пырыс нерген идалык мучко кутыренна. Тўрлӧ урлыкым таҥастаренна, шымлымашым ыштенна. Йоча-шамыч шке сурт янлыкышт дене куанен палдареныт.

Теве Раиль Козлов леопардла койшо Кичи лўман сурт янлыкшым моткоч йӧрата. Нуным **ўыл снимкыште** уждыда. Рвезе кружокысо йолташыже-влаклан тыгай уверым ямдылен: «Тўнямбалне 600 миллион наре пырыс ила. Ик ассоциацийын уверже почеш, 72 урлык уло». Вика Костроминат ныл йолан йолташыже нерген каласкален (**кўшыл снимкыште**) да ешарен: «Кугурак ийготан-влак суткаште 16-20 шагат мален кертыт. 100 тўрлӧ йўкым луктын моштат».

Российыште пырысын кечыжым 1 мартыште палемдат. 2002 ий гыч пырысын тўнямбал кечыжым 8 августышто пайремлаш тўнгальныт.

Надежда
ГОДУНОВА.
Фото-влакым
йочасадын архив-
ше гыч налме.



Шокшышто пийлан кузе полшыман?

Кенжежым шокшо игече годым айдемылан веле огыл, янлык ден кайыквусылан, суртвольык ден сурткайык, сурт янлыкланат куштылго огыл. А кужу, чока пунан пий-влак ты пагытым кузе илен эртарат? Нуным эскерыме шотышто Йошкар-Ола гыч ветеринар врач, грумер Н.В.Васильева (**снимкыште**) дене мутланышна.

— Нина Валериановна, яллаште ятыр еҥ кужу пунан пийжым тўредеш. Кеч-могай урлык пийым тўредаш лиеш мо?

— Пўртўс пийлан пуным пӧлеклен, садлан нуно шокшо игечылан тунемше улыт. Пўжвўдышт йылме, копа гоч лектеш. Утыжым кудалыштыктыман, модыктыман огыл. Тыгай игечыште тек канат. Чынак, пийым шукын шке гыч тўредыт. Но чыла урлык пийым тўредаш ок лий. Шпиц урлык пийым кўчыкын тўредман огыл, тетла пунжо огеш куш. Садлан мучашыжым веле кўчыкемдыман. Тыгак лабрадорым, хаским да ятыр моло урлыкымат тўредаш ок лий. Коваштышт кече дене когарген кертеш, эше черланат. А йоркширский терьерым кеч кажне тылзын тўред, но тудымат эскерыман. Кызыт пийлан шуко тўрлӧ вургем уло. Кечан годым мамык куэм гыч ургымо куштылго майкым чикташ лиеш.

— Южышт пийыштым чаманат да верысе пўяш йўштылаш пуртат. Тиде пийын тазалыкшылан энгекым ок ыште?

— Пийым кеч-могай вўдыш йўштылаш пурташ келшен то-



леш. Тўнгжӧ — вўд яндар лийже. Пий вўдпорсын коклаш ынже пўтырналт манын шекланыман. Тудым вўдыш трукышто шуыман огыл, тек шке семынже пура.

— Шокшо игече годым пийым мо дене сийлаш темледа?

— Эн ончыч ўмылан верыш верандыман. Шукырак вўдым пуыман. Мискыш темен, икмыняр верешындаш лиеш. Пульверизатор дене вўдым жапын-жапын шыжыктыман. Шокшышто кочкыш писын локтылатеш, садлан иканаште шуко пуыман огыл. Тўнгжӧ — кочкыш шопышо ынже лий.

— Пий утыждене ырен манын, кузе палаш лиеш?

— Тыгодым пий эркын тарванылаш, кок могырыш лупшалт ошкылаш. Ўжат — огеш ончал, чўчкыдын шўла. Ныл йолан йолташдам аралыза, кеч-могай жапыште полшаш ямде лийза.

Христина АЛЕКСАНДРОВА
мутланен.

Фотом еш архив гыч налме.

Кумылым шижыт

Имньым йӧратем. Нуно мотор, поро улыт. Шкешт деке шыма еҥым веле лишемдат. Айдемын кумылжым, шонымашыжым пуйто шижыт. Кушкыж кудалышташ тунемаш манын, Оршанке районышто имне-влакым кучышо ик еш деке уналыкеш коштынам. Мыланем Шўдыр лўман имньым ойыреныт. А **снимкыште** Мансурам кушкыжынам.

Анастасия МУХАМЕТОВА.

Оршанке, Кугунчўр.

Фотом еш архив гыч налме.





1714 ий 9 августышто Петр Первыйын флотшо Гангут мыс воктене швед-влакым сенген.

1944 ий 9 августышто Ленинград ола верч крдалмаш мучашлалтын.

Юзо пагыт

Кенгеж, йоратыме кенгеж, могай тый поян улат! Кайыкым, янылыкым, вольыкымат сийлаш ситыше шудет уло. Айдемымат түрлө тусан пеледыш, емыж-саска, яндар юж дене куандарет. Чылажат мыланем келша.

Удыр-рвезе-влаклан ты пагытын сылнылыкшым түрлө шорын гыч почын пуаш тыршем. Тидлан түрлө йоным кучылтам. Теве шукерте огыл шинчалыкшым кенгежым сүретлаш йодинам. Кузе нуно түрлын ужыт улмаш! Икте сүретыште тенгыз, курык да пальмывым ончыктен, весе – ял воктенысе пасушто тракторын пашажым. Ойыртем уло гынат, кажныже кенгежым эн сөрал пагытлан шотла.

Надежда ГОДУНОВА.
Авторын фотожо.



Артем Шубин ден
Маша Пекшеева.



Ужар тувыран тамле саска

Тувыржо ужарге, шкеже шере, тамле. Мечым ушештара. Туштемлан вашмутым муда? Чын, тиде арбуз. Кенгежым тиде саска шуэшат, ме кажне кечын кочкаш ямде улына. Шокшо игече годым поснак сай, йүмө шумо эрта. Тыглай кечынат, пайрем годымат үстелнам сораствара, кумылнам нолта. Ковамын шочмо кечыжланат арбузым намина ыле. Түшкан кочмо годым эшеат тамлын чучеш. Фотоат тудын дене моторын лектеш.


Санкт-Петербург ола гыч толшо Устинья шўжарна, Ксюша шўжарем войзалташ йоратат, нунын пелен шогалаш мыят келшышым (снимкыште).

Эшежым арбуз тамле веле огыл, тыгак пайдале. Тудо антиоксидантлан, цитруллинлан, А, С, В витамин-влаклан поян. Вес ийын йырагышке шке шындаш шонена.

Алина СУББОТИНА.
2-шо номеран Марко школ.
Фотом еш архив гыч налме.

Тушто-влак

- Ик капкашке моткоч шукын шем шорыкым поктылыт.
- Кырат гынат, ок шорт, утларак веле торшталта.



9 август-
чонгышын
кечыже

Ошмаште моднем

Мый тале чонгышо улам, Кертат тый ўшанен пашам. Кўлеш гын сылне кугу ор – Чонгем ошма гычын, ит өр. Тенгече той сөрал полат Ах, шогыш кечыгут волгалт. Мый шумым вўд дене варем, Чылт кечыгут тыге моднем.

Эчук.

Закупаем
ЛИПОВЫЙ МЁД

250 руб. за кг

Минимальный объем
400 кг

Сами приезжаем,
тара на обмен, деньги сразу.

Тел. 8-965-356-57-14

Цена на дату публикации

Реклама



Ямде лий

Газетым Кыл, информационный технологий да массовый коммуникаций сферым эскерыме шотышто федеральный службыв Юл кундем федеральный округысо управленийыштыже регистрироватлыме.
Номер – ПИ № ТУ52-01404, 2023 ий 22 сентябрьыште пумыо.

0+

Марий Эл Республикысе «Марий Эл» увер агентстве» КАУ.
Директор – Е.И.КУЗНЕЦОВ.
Тўн редактор олмеш – О.В.МАЙКОВА.

Индекс П4696.
Тираж 1500 экз.
Заказ
Формат – А-4-8.

Учредитель-влак:
Марий Эл Республикысе Тўвыра, печат да калык-влакын пашашт шотышто министерстве, Марий Эл Республикысе «Марий Эл» увер агентстве» КАУ.

Редакций да издатель: Марий Эл Республикысе «Марий Эл» увер агентстве» КАУ, 424006, Йошкар-Ола, СССР Вооружённый Вийын 70-ше идалькыше урем, 20-шо пўрт. Тел. 8(8362) 45-22-82.

Газетым редакцийыште погымо да верстатлыме, «Марий Эл Республикысе Правительствын типографийже» ООО-што ямде оригинал-макет гыч савыктыме. Типографийын адресше: 424000, Йошкар-Ола, Комсомольский урем, 112. Печатьыш пумыо жап – 14-00, фактически – 13-00.

Авторын да редакцийын шонымашышт түрлө лийын кертят. Серыш-влак мўнгеш огыт колталт. Ак – кутырен келшыме почеш.

vk.com/yamde_lii
t.me/yamdelii
yamde_lii@mail.ru
yamdelii@mediamari.ru
(автор-влаклан)
Сайтын адресше: ямделий.рф




У конкурс



Тиде кияр огыл. Снимкысе ты саскам ужомеке, тыге манмемлан ўшанеда? Лўмжő армянский кияр гынат, тиде дыне. Моткоч шер.

Мария ЯКОВЛЕВА.
Звенигово, Кожласола.


• Сүрөтүм ончен,
точко-вакым ушыза •



• Сүрөтүм чиялтыза •



• А ну-ка, шотлыза! •



М.ШКЕТАН ЛҮМЕШ МАРИЙ КУГЫЖАНЫШ ДРАМЕ ТЕАТР
Шкетан театр пүртүс лонгаште
12+
14 август 18:00

**ЗВЕНИГОВО РАЙОН
КАКШАМАРИЙ**

Геннадий Гордеев
ПАЛАНТАЙ
Рекламе. Спектакль-концерт

С синхронным переводом на русский язык

Театрны художественный вулгатышмеке —
Марий Эллы калык артистше Роман Алексеев

12+ 8(8362)78-4378 SHKETAN.RU